

BATIZMU NA'I NIAN

Tema Festa Batizmu Na'i nian

Iha Jezús nia Batizmu iha Jordaun ninin, hatudu sai Maromak nia Oan-Mane doben, ne'ebé Aman haruka mai mundu, ho misaun atu salva ni liberta ema sira. Hodi kumpre Aman nia projetu, Jezús sai ida hanesan ita, fahe ninia frajilidade no umanidade, hasai ita husi egoizmu no salan, hodi kompromete An atu lori ita ba vida nakonu.

Leitura dahuluk hakalaken kona-ba “Atan” misteriozu ida, ne'ebé Maromak hili no haruka ba ema sira atu harii mundu ida justisa no dame rohan-laek... Hodi Maromak nia Espiritu nia kbiit, Nia konkretiza misaun ne'e ho haraik- an no simplisidade, hodi la uza poder, impozisaun, prepoténsia, basá eskema sira-ne'e la'ós Maromak nian.

Iha *Evanjellu*, haktuir konkretizasaun promesa profétika nian ne'ebé fó sai ona iha leitura dahuluk: Jezús mak Oan/”Atan” ne'ebé Aman Maromak haruka, no Espiritu horik iha Nia, no ninia misaun mak lori ema sira nia libertasaun. Hodi obedese ba Aman, Nia sai ema, identifika An ho ema sira nia frajilidade, la'o ho sira, atu bele promove no lori sira ba rekonsiliaun ho Maromak, ba moris iha plenitude.

Leitura daruak afirma fali katak Jezús mak Oan doben ne'ebé Aman haruka ba mundu atu konkretiza projetu salvasaun nian; tanba ne'e, Nia buka halo di'ak ba ema sira no hasai sira hotu iha opreaun laran. Ne'e mak sasin ne'ebé eskolante sira tenke fó, atu salvasaun ne'ebé Maromak oferese bele to'o ba povu hotu raiklaran nian.

LEITURA I – Is 42,1-4.6-7

Ita-nia testu pertense ba “Livru Konsolasaun” Deutero-Isaías nian (kf. Is 40-55). “Deutero-Isaías” mak naran konvensional ne'ebé biblista sira fó ba profeta anónimu eskola Isaías nian, ne'ebé kumpre nia misaun profétika iha Babilónia, entre judeu sira iha ezíliu. Ita iha finál Éziliu nian, entre 550 no 539 mK no judeu sira frustradu no lakon dalan, maski profeta Ezequiel promete libertasaun ne'ebé sei mai lalais.

Deutero-Isaías mak mensajen atu konsola sira. Nia haklaken libertasaun no kompara sira-nia saida husi Babilónia hanesan ézodu antigu, husi Ejitu (kf. Is 40-48); hafoin, haklaken rekonstrusaun Jerusalém nian, sidade ne'ebé funu harahun tiha ba akudesan, maibé mArumak sei lori fali ba nia ksolok no dame rohan laek (kf. Is 49-55).

Testu ne'ebé ohin propoin mak parte husi knananuk dahuluk “Atan' nian (kf. Is 42,1-9). Posivel katak personajen knananuk dahuluk nian refere ba Ciro, liurai Pérsia nian, ema ne'ebé Maromak konfia ninia Povu nia libertasaun.

LEITURA II – Apost 10,34-38

“Apóstolu sira-nia hahlok” mak katekeze ida kona-ba “etapa Kreda” nian, katak forma oinsá eskolante sira asume no kontinua projetu salvasaun Aman Maromak nian – no oinsá lori ba mundu tomak, bainhira Jezús husik ona mundu ne'e.

Livru fahe ba parte rua. Ida dahuluk (kf. Apost 1-12), reflesaun apresenta mai ita Evanjellu nia difuzaun iha Palestina nia laran, liuhui Pedro no Apóstolu na'in Sanulu-resin-rua nia hahalok; ida daruak (kf. Apost 13-28) apresenta mai ita Evanjellu nia espansaun iha Palestina nia li'ur (to'o Roma), liuliu hodi Paulo ninia hahalok.

Ita-nia testu ohin integra iha parte dahuluk "Apóstolu sira-nia hahalok" nian. Iha ne'ebá haktuir Pedro nia atividade misionária iha rai-tetuk Sharon nian (kf. Apost 9,32-11,18). Testu propoin mai ita sasin no katekeze Pedro nian iha Cesareia, iha senturiaun romanu nia Cornélio nia uma. Espíritu mak bolu nia (kf. Act 10,19-20), nune'e Pedro tama iha Cornélio nia uma, hato'o ba nia buat esensiál fiar nian no sarani nia, nune'e mós nia uma-laran tomak (kf. Apost 10,23b-48). Epizódium ne'e importante tanba Cornélio mak ema jentiu dahuluk atu tama iha kristianizmu liuhusi Apóstolu ida husi na'in Sanulu-resin-rua nia haklaken no sasin: signifika katak moris foun mai husi Jezús no lori ba ema hotu laho disitinsaun.

EVANJELLU – Lc 3,15-16.21-22

Evanjellu domingu ne'e nian apresenta enkontru entre Jezús no João Baptista, iha mota Jordaun nia ninin. Iha sirkunstánsia ne'e, Jezús simu batizmu husi João.

João Baptista mak líder/gia karismátiku movimentu ida ho marka populár, ne'ebé haklaken katak "Maromak nia justisa" besik daudaun. Ninia mensajen nia sentralidade mak konversaun ne'ebé inklui ritu purifikasaun liuhusi bee.

"Batizmu" ne'ebé João propoin, la'ós buat foun ida. Judaíзму koñese ritu oioin kona-ba luku/imersaun iha bee laran, ne'ebé liga ho kontestu purifikasaun ka mudansa moris nian. "Tama iha bee laran" inklui iha ritu integrasaun ema jentiu sira ne'ebé konverte ba judaíзму katak, iha comunidade Povu Maromak nian.

Iha João nia perspetiva, "batizmu" ne'e mak ritu inisiasaun ba comunidade mesiánika: sé mak simu batizmu ida-ne'e hakribi salan, konverte an ba moris foun no integra an iha comunidade Mesias nian.

Sá loos signifikadu hahalok Jezús nian ne'ebé apresenta an ba João atu simu "batizmu" purifikasaun, arrendimentu no perdaun salan nian?

Ba Lucas, João Baptista mak sasin ikus tempu salvasaun nian ne'ebé to'o ona rohan: tempu Aliansa tuan nian (kf. Lc 16,16). Ho Jezús ne'ebé mosu iha públiku hahú daudaun tempu foun, tempu iha-ne'ebé Maromak rasik mai iha mundu, hao an ba ema, atu oferese ba humanidade ne'ebé moris iha salan nia ukun, moris no salvasaun. Iha epizódium "batizmu" nian haktuir misaun spesífika no loos identidade Jezús nian.